

BUK MUKWOJO PA MOSES

ma gilwojo

ACAKKI

Lubanja oketo lobo ki dano

1 ¹ I acakki piny Lubanja oketo polo
ki lobo. ² Lobo onono tve nono,
onyobbe woko atata. piny macol ocido
wi kut matut, kun Cwiny pa Lubanja
twago wi pii.

³ Lubanja owacci, “Wek lejo obed
te”; ci piny obedo lej. ⁴ Lubanja oneno
lejo ni ber; Lubanja opoko kin lejo ki
colpin. ⁵ Lubanja olwojo lejo ni
Dyecen, ki colpin olwojo ni Dyewor.
Piny oyuto dok piny oru, meno nino
acel.

⁶ Lubanja owacci, “Wek pete orine i
kin pii, me poko kin pii ki pii wadi.”
⁷ Ci Lubanja otiyo pete me poko pii ma
tye piny i te pete ki pii ma tye malo i wi
pete; ci otimme kit meno. ⁸ Lubanja
olwojo dan pete ni polo. Piny oyuto
dok piny oru, meno nino me aryone.

⁹ Lubanja owacci, “Wek pii ma tye i
te polo ocokke, ogurre i kabedo acel,
wek piny mutwo onen”; ci otimme kit
meno. ¹⁰ Lubanja olwojo piny mutwo ni
Lobo, ki pii ma ocokke, ogurre kacel-li
ni Nam; ci Lubanja oneno ni ber.
¹¹ Lubanja owacci, “Wek lum otwi i wi
lolo, ki ginapita ma nyako nyiggi, ki
yadi ma nyako nyiggi ma kodi tye i igi,
macalo kit kwagi tye, i wi lolo”; ci
otimme kit meno. ¹² Lum ocako twi i
wi lolo, ki ginapita ma nyako nyiggi i
kit kwagi acel acel, ki yadi ma nyako
nyiggi ma kodi tye i igi, macalo kit
kwagi tye. Ci Lubanja oneno ni ber.
¹³ Piny oyuto dok piny oru, meno nino
me adekke.

¹⁴ Lubanja owacci, “Wek gin ma ryeny
obed i kom pete me polo me poko
dyecen ki dyewor, ki me bedo ginanena
ma nyuto kare ki nino ki mwaka,
¹⁵ wek gubed gin ma ryeny i kom pete
me polo ma menyo lobo”; ci otimme

kit meno. ¹⁶ Lubanja oketo gin madito
aryo ma giryeny, wek ma ryeny madit-te
aye olo dyecen, ki ma ryeny matidine
olo dyewor; dok oketo lwak lakalatwe
bene. ¹⁷ Lubanja oketogi i kom pete me
polo me menyo lobo, ¹⁸ me loyo dyecen
ki dyewor, ki me poko kin lejo ki
colpin. Ci Lubanja oneno ni ber.
¹⁹ Piny oyuto dok piny oru, meno nino
me anwenne.

²⁰ Lubanja owacci, “Wek pii onywal
gin makwo ma gicorre limuk, ki winyo
bene gutuk lamalo i wi lobo i dan pete
me polo.” ²¹ Lubanja oketo nyang
madonjo i nam, ki kwa gin makwo
ducu ma gimol, ma gicorre limuk i pii,
macalo kit kwagi tye, ki winyo ma
gituk ki bwomgi, macalo kit kwagi tye.
Ci Lubanja oneno ni ber. ²² Lubanja
omiyogi gum kun wacci, “Wunywal,
wunya, wupon pii ki nami, winyo bene
gunya i wi lobo.” ²³ Piny oyuto dok
piny oru, meno nino me abicce.

²⁴ Lubanja owacci, “Wek lobo onywal
gin makwo i kit kwagi: lee ma paco, ki
gin ma lak alaka, ki lee me tim macalo
kit kwagi tye”; ci otimme kit meno.
²⁵ Lubanja oketo lee tim macalo kit
kwagi tye, ki lee ma paco macalo kit
kwagi tye, ki gin ma lak alaka piny i
nom, macalo kit kwagi tye, Ci Lubanja
oneno ni ber.

²⁶ Lubanja owacci, “Weku wacweyu
dano ma gical ki wan; wek gin aye gulo
rec ma i nam, ki winyo me polo, ki lee
ma paco, ki wi lobo ducu, gulo bene
gin ducu ma lak alaka wi lobo.”
²⁷ Lubanja ocweyo dano i kit calle
kikome; ocweyo laco ki dako. ²⁸ Lubanja
omiyogi gum kun wacogi ni, “Wunywal,
wunya, wupon lobo, wulo bene; dok
wulo wa rec ma i nam, ki winyo me
polo, ki gin ducu makwo ma giwoto i wi
lobo.” ²⁹ Lubanja owacci, “Nenu, ami-
yowu ginapita ducu ma nyako nyiggi
ma tye i wi lobo ducu, ki yadi ducu ma

nyako nyiggi ma kodi tye i igi; wubi-camogi.³⁰ Dok lee ducu me tim, ki winyo ducu me polo, ki gin ducu ma lak alaka wi lobo, ma gitye ki kwo, amiyo botgi ginapita ducu madyak me bedo camgi”; ci otimme kit meno.³¹ Lubanya oneno gin ma don otiyo ducu, ci nen, tye mabeco twatwal. Piny oyuto dok piny oru, meno nino me abicelle.

2 ¹ Polo ki lobo yam giketo otum kit meno, ki lwak mony ma tye iye ducu. ² I kom nino me abiro en aye Lubanya otyeko iye ticce ducu ma yam otiyo; en oywe i kom nino me abiro i kom ticce ducu ma yam otiyo. ³ Ci Lubanya omiyo gum i kom nino me abiro, olonyo obedo maleñ, pien i kom nino meno en aye Lubanya yam oywe iye i kom ticce ducu ma en obedo ka tiyo me keto lobo.

⁴ Man aye acakki nya pa kwa gin ma i polo ki i lobo i kare ma giketogi kwede.

I nino meno ma Rwot Lubanya otiyo iye polo ki lobo-ni, ⁵ yat mo me tim onono peya tye i wi lobo, onono doo mo pud pe ma otwi wi lobo, onono Rwot Lubanya peya omiyo kot ocwer i lobo, dok onono peya tye dano mo ma puro lobo; ⁶ ento lupu ocako duny malo, ci obido lobo ducu. ⁷ Ci Rwot Lubanya ocwego dano ki apwa me njom, okuto yamo me ywuego i ume, dano odoko gin makwo.

Poto Eden

⁸ Rwot Lubanya opito yadi i poto ma tye i Eden, tun wokcen; en aye oketo iye dano ma en ocwego-ni. ⁹ Dok Rwot Lubanya omiyo yadi gutwi i njom, kwa yadi ducu mammwonya ma neno ber, ki mabeco me acama, dok oketo yat me kwo i dye poto bene, ki yat me neyo gin maber ki marac.

¹⁰ Kulu yam onono mol a ki i Eden, ma kelo pii i poto, iye opokke ki kunnu, odoko kulu ayan. ¹¹ Nyin kulu mu-kwongone Picon; en aye kulu ma mol rumo lobo Kavila ducu, ma a iye jabu. ¹² Jabu ma tye i lobo meno beco; odok yat ma gilwojo bedola ki got onik tye kunnu bene. ¹³ Nyin kulu me aryon Gikon, ma orumo lobo ducu me Kuc. ¹⁴ Ki nyin kulu me adekke

Taigric; mol dok tun wokcen me Aciria. Ki kulu me ayanne Euprate.

¹⁵ Rwot Lubanya otero dano, oketo i poto Eden wek opur, dok ogwok bene. ¹⁶ Ci Rwot Lubanya ociko dano ni, “Yadi ducu ma tye i poto, camgi macalo imito; ¹⁷ ento yat me neyo gin maber ki marac pe icam, pien i nino ma ibicamo iye, en aye ibito iye bene.”

¹⁸ Ka dok Rwot Lubanya owaco ni, “Pe ber dano obed kene; abitimo lakony ma romme.” ¹⁹ Ci Rwot Lubanya ocwego lee tim ducu ki winyo ducu me polo, nia ki i njom, okelogi bot dano me neno kit ma ebicako ki nyinji. Kit ma yam dano ocako ki nyin gin makwo acel acel ducu, en aye obedo nyinji. ²⁰ Dano ocako nyin lee ma paco ducu, ki winyo me polo, ki lee tim ducu; ento lakony pa dano ma romme aye onono pud pe onen. ²¹ Rwot Lubanya omiyo nino madwoj omako waŋ dano; ka en tye ka nino, ci okwanyo cogo laknjete acel, omwono waŋe woko ki rijo. ²² Ci cogo ma Rwot Lubanya okwanyoni ocwego odoko dako, ka okelo bote. ²³ Dano owacci,

“Man aye cogo mua i cogona kikome,

ki rijo bene mua i rjona kikome; gibilwojo nyinje ni Dako,

pien gikwanyo ki i kom Laco.”

²⁴ Mumijo laco weko wonne ki minne, moko kom dakone likan, gin aryo gidoko kom acel. ²⁵ I kare meno laco ki dakone onono pud gibedo munero ma lewic pe makogi.

Acakki bal

3 ¹ Twol yam onono ryek makato lee tim ducu ma Rwot Lubanya oketo. En owaco ki dako ni, “Lubanya mono owacci, ‘Pe wucam yat ducu ma tye i poto-ni?’” ² Dako otito ki twol ni, “Watwero camo nyig yadi ducu ma tye i poto-ni, ³ ento Lubanya ociko ni, ‘Pe wubicamo nyig yat ma tye i dye poto, pe wugud kome bene, wek pe wuto.’” ⁴ Ci twol owaco ki dako ni, “Pe wubito. ⁵ Pien Lubanya neyo ni, ka wucamo, ci waŋwu biyabbe woko, ci wubidoko calo Lubanya, miyo wuneyo gin maber ki marac.” ⁶ Ka dako oneno ni yat-te ber me acama, dok nen mwonya bene, dok

yat meno ber, cwiny dano pyette i kome,
pien miyo gidoko ryek, ci opwono
nyige, ocamo; omiyo mogo bot cware,
ci ocamo.⁷ Gin aryo ducu wang
oyabbe woko, gucako neyo ni kara
gitye munero, ka gukwoyo pot olam
guruko i pyergi.

⁸ Ka guwinyo Rwot Lubanya woto i
poto i kare ma cen okwe, ci dano ki
dakone gukanne woko i nyim Rwot
Lubanya i kin yadi ma tye i poto.⁹ Ci
Rwot Lubanya olwojo dano kun wacce
ni, "In mono itye kwene, kaa?"¹⁰ En
ogamo ni, "Awinyo ka iwoto i poto, ci
lworo omaka, pien atye munero, akanne
woko."¹¹ Dok openye aye ni, "Aja ma
don otitti ni itye munero? Ityeko
camo nyig yat ma onojø aciki ni pe
icam-mi ce?"¹² Dano ogamo ni,
"Dako ma imiya ni obed kweda-ni aye
omiya nyig yat meno, ci acamo."¹³
Rwot Lubanya dok openyo dako ni,
"Man kono itimo piyo?"¹⁴ Dako ogamo
ni, "Twol aye obwola, omiya acamo."
¹⁴ Rwot Lubanya owaco bot twol ni,

"Pien in aye itimo man,
giceno in makato lee ma paco ducu,
ki makato lee tim ducu.
Ibilak, iywane piny ki ii,
dok ibicamo apwa
i kare me kwoni ducu.

¹⁵ Abiketo mone i kin in ki dako,
ki i kin likwayi ki likwaye;
en bigoyo wii,
in ibitonjo opunye."

¹⁶ Ki bot dako owacce ni,
"Abimeddi arem matek i kare me
nyodo; ibinywalo litino ki arem, cwinyi
bipyette i kom cwari, dok en aye biloyi."
¹⁷ Ki bot Adam owacce ni,

"Pien in aye iwinyo dog dakoni,

ci icamo nyig yat
ma aciki iye ni, 'Pe icam',
giceno lobo piri;
ibicamone ki aroma
i kare me kwoni ducu.

¹⁸ Loboni biceko okuto ki ocok,
ibicamo pot dek ma i tim.

¹⁹ Ibicamo kwon ki kwok ma cwer
ki i tur nyimi,
nio ka ibidok i nom,
kit ma con gikwanyi ki iye;
in apwa,
dok bene ibidok i apwa."

²⁰ Dano ocako nyin dakone ni Kawa,
pien en aye megij jo ducu makwo.

²¹ Rwot Lubanya oyubo laa aruka, ka
omiyo Adam ki dakone guruko.

²² Rwot Lubanya owacci, "Nen, dano
don odoko rom ki nat acel i kinwa,
don neyo gin maber ki gin marac.
Komeddi pe dok wawek orye cine
opwon nyig yat me kwo ocam doki,
miyo don bibedo makwo nakanaka."
²³ Mumiyo Rwot Lubanya ocwale woko

ki i poto Eden, wek odok opur gire
nom ma yam gikwanyi ki iye-ni.
²⁴ Oryemo dano woko, ci oketo lukerubi
yo tun wokcen me poto Eden, ki pala
lucwan ma lyel mac, ma wirre tunji ki
tunji, me gwoko yo ma cito i kom yat
me kwo.

© Copyright United Bible Societies, 1985

The Bible in Acholi. Published
by the Bible Society of Uganda, P.O. Box 3621,
Kampala, Uganda.